

In avieuler sin rodaglias

Apiculturs grischuns: Project da scola

DA GION NUTEGN STGIER / ANR

■ **Ina aventura singulara tar il tema apicultura ed avieuls è vegnida lantschada ier a Landquart en in dals deposits da la Viafier retica. In tren vegl è vegnì transformà en in «avieuler» cun bleras infurmaziuns da l'apicultura e dals animalets.** En noss chantun avain nus radund 700 apiculturs e da quels er ina rotscha apiculturs giu-

vens. Tut tenor grondezza dals pievels d'avieuls e tenor primavaira e stad produtgescha mintga singul da quels apiculturs tranter 100 kg e 200 kg mel d'avieuls. Davos la produczion stat blera lavur, ina gronda tgira, in pau savida e lura er intgina perseveranza. In bun apicultur è fatschentà sur onn cun sia passiu per avair lura la stad ina raccolta fritgaivla. Da la lavur al product e quai en tun, pled e maletg, gist quai

survegnan ils uffants e giuvenils cun visitar il tren, ditg auter l'avieuler sin rodaglias.

Ir tar las scolas

Dapi il 2011 s'engascha l'Uniun grischuna dals giuvens apiculturs cun il num «Flugschnaisa» cun intgins projects per la promoziun da l'apicultura e cunzunt per mussar la gronda valor da quella a scolars e scolaras. Sco quai che *Urs Nutt*, il president e mainaproject, ha ditg saja l'interess da las scolas per visitar apiculturs e guardar a quels sur ils givels dad onn tar onn vegnì pli grond. Quai saja ina da las raschuns che l'uniun saja sa decidida da lantschar il project «Grischa Biena uf da Schiena» an collavuraziun cun la Viafier retica ed auters partenaris. Empè ch'ils scolars vegnan tar ils apiculturs gijian quels tar las scolas e quai en l'entir Grischun.

Durant 19 emnas sin viadi

Per Urs Nutt èsi er da gronda impurtanza da mussar als uffants e giuvenils las valurs da la natira, da l'ambient, nossa ritga biodiversità e lura l'impurtanza da mintga avieul per fauna e flora. En il tren transformà en in lieu per scuvrir l'apicultura cun tut sias fassetas savessan las infurmaziuns en rumantsch, tudestg e talian strusch esser pli fascinantas. Durant 19 emnas è il tren sin viadi

e quai da l'avrigl fin a la fin da settember 2017.

Gia èn annunziadas 32 scolas

Nutt è intgantà che fin oz èn gia annunziadas 32 scolas per ir sin ils fastizs dals apiculturs e dals avieuls. Fin ussa saja quel project en quella furma cun in tren-avieuler movibel l'unic en Svizra, menziuna l'expert ed iniziand da quel project. A partir da quel di che l'acziun cumenza vegn in pievel d'a-

vieuls cun var 4000 avieuls ad avair in nov dachasa e quai en l'avieuler sin rodaglias che va d'ina staziun a l'autra tras tut las regiuns da noss chantun. Quai è tenor successiu dal viadi: Cuir, Glion, Domat, Tusaun, Landquart, Aschera, Claustra, Tavau, Filisur, Samedan, San Murezzan, Punterschigna, Zernez, Scuol, Mustér ed Arosa. Annunziadas èn pussaivlas da far online e quai sin la pagina d'internet www.grischa-biena-uf-da-schiena.ch.



Il directur da la Viafier retica Renato Fasciati cun dus uffants da la scola da Landquart.



Quai è il tren-avieuler movibel che vegn ad ir tras l'entir Grischun.